

鶴

林

集

三

欽定四庫全書

鶴林集卷五

宋 吳泳 撰

內制

明堂奏告祝文

天地

伏以丕釐景命奄宅嘉師惟泰元尊每荷溥臨之貺其
坤道順實資敏植之恩用涓萬寶告成之時爰秩九筵
合祭之禮率由彝典敢告前期

宗廟

伏以獲承洪緒宏濟多艱爰熙紫壇練時卜日於穆清
廟尊祖敬宗祇率彛章預伸潔告

社稷

伏以古者載芟而祈良耜而報各以歌樂告於神明矧
當祭祀之秋宜致恭先之薦

太乙

伏以明堂度九尺之筵靡神不舉太乙開八通之道降

福孔夷用卜季辛敢伸昭告

天慶觀報恩觀

伏以天無聲無臭惟道可憑祭有報有祈以時為大顧
慙菲薄獲奉粢盛壇於丙地之陽卜以辛日之薦尚祈
昭鑒相我熙成

諸陵攢宮

伏以將祀世室載瞻崇丘未陳犧牲珪幣之恭先致祖
考神祇之告尚祈來格以相熙成

四瀆五嶽四海

伏以昭於天地方嚴陟配之文望于山川具有秩祭之
典季辛穆卜先申告忱

嶽瀆海路通去處

伏以明堂孔陽方議合祠之典宗伯辨位乃陳四望之
儀秩於山川沿于江海靡神不舉先事告忱

遷神主

伏以爰熙紫壇聿嚴禋祀於穆清廟式謹繕修庀工

方新奉主有恪用涓吉日虔告明神

明堂赦文

朕嗣宅丕后保綏受民上帝臨汝無貳爾心敢不盡靈
承之事先王惟時懋敬厥德未嘗忘裸饗之忱每夙夜
以惟勤庶神天之克典顧德不類遭時多艱兵氛未澄
星紀弗靜京畿邦之根本而淫雨害于衆盛漢峴國之
咽喉而蝨賊搖我邊鄙戰士被介冑不得卧丁夫罷轉
餉不得休瘼茲下民靡所寧宇念天地以好生為德徧

覆包含而無殊而祖宗以兼愛為仁聰明神武而不殺
豈親接三才之奧亡哀矜庶獄之心蓋嘗以干戈省厥
躬以袪象救其政雖承宇之霏開霽未還時和歲稔之
風雖侵疆之騎倏回寧保地淨冰寒之日若匪籲蒼旻
而潔告其何措方夏於阜安爰刺六經之文更規五室
之制有秩禮園有嚴頌堂奉牲以告不在牲而在民力
之普存更幣以祈不惟幣而惟國用之均節憑至誠之
洞屬薦明德之馨香於是登彛闕宮奠璧清廟夙駕齋

輅親祠總章袞龍作繪而五采施銅玉鳴詩而九歌應
多士顯相陟降在庭百工倅從左右厥辟瞻和氣之薰
浹儼神光之陸離豈惟鐘噲噲鋸鋸如見旗容容騎
沓沓蓋上天日監王者之處曾咫尺之不違而庶民是
近天子之光宜始終之若保既荷靈娛之來燕豈應餒
惠之不均迺御端闈式盼大號嘉與函生之衆共迎景
貺之新於戲崇周官九尺之筵精意已通於肸鬯肆呂
命五刑之赦湛恩斯徧於埏垓尚賴奮庸亮采之臣秉

德陪祠之彥烈文羣辟孔武六師永肩勵翼之忠宏濟
不平之業

明堂冊文

景靈宮

明明我祖道峻於天濯濯厥靈其基明辟猶木有本猶
水有源肆台小子既受帝祉季秋之月宗祀明堂其日
用辛工祝致告丕釐景命於萬斯年

太廟

於穆清廟世有哲王德厚流光必百世祀台恐德弗類
過前人光是用孝饗入太室裸洞洞屬屬苾苾芬芬來
燕來寧俾緝熙於純嘏

昊天上帝

倬彼昊天皇矣上帝親德饗道監觀四方施予冲子綏
受茲命服大裘而冕祀乎明堂高高在上無日不顯以
祈福祥以弭災兵乂我受民永寅念于祀

皇地祇

惟王建國掌邦地祇瘞埋泰圻有冊有典今冲子嗣主
名山川相其陰陽居明堂左个禮以黃琮祀用黝牲土
穀惟修庶草蕃廡萬邦咸休敬拜下土之靈

太祖皇帝

天作之君神武不殺肇造區夏啟迪後人以予小子夙
夜必祀是用大饗帝度九尺之筵籩豆靜嘉牲牷肥腍
格于藝祖克配彼天永言孝思無墜寶命

太宗

天造草昧文王康之始基矣嗣武受之者定爾功布昭
聖武天下為一百世不遷今文子文孫敬宗尊祖我將
我享王者之堂潔爾牛羊與其黍稷神保是格日靖四
方

明堂禮成奏謝

景靈宮萬壽觀會聖宮太乙宮

伏以祗奉瑄玉肅臨壇垓考媯庭肆類之文宗姬室九
筵之制列聖降祉三神蕃釐豈涼德之克堪實上皇之

顯相用伸昭報庶永延休

太乙宮改上
皇作上靈字

諸陵攢宮

伏以迪循彞典寅祀總章上帝時歆垂恩若風雨而下
百神既饗降福如岡陵之增載瞻橋山實邇秦望爰遣
明馨之薦以將昭報之忱尚赫厥靈垂裕乃後

五嶽二海四瀆

伏以大饗合宮沆成熙事祀于天地既荷博臨望于山
川敢遲昭報尚冀威靈之假允臻福祿之來

諸陵

伏以總章汜祀熙事告成事天之明堅一忱而罔間裒
時之對與萬國以咸休荷烈祖之顧歆瞻崇丘而控謝
南海南瀆南嶽

伏以頃者宗祀徧于羣神喬嶽之靈滄海之漚相予熙
事永臻厥成神之格思敢不昭報

南鎮會稽山

節彼南山維禹甸之頃以犧牲祀于陽館既荷帝祉神

金定四庫全書
卷五
來宴娛熙事備成敢忘昭報

改元諸陵奏告

伏以創業垂統烈祖之休繼天奉元一王之法合兩朝之懿槩更首歲之嘉名載瞻崇丘用伸潔告

孝宗皇帝修換殯宮文

奉先思孝瞻彼上宮揆日庀工動乎下土敢告于廟以寧其神

光宗皇帝修換殯宮文

伏以敢廟之嚴明神所宅陰虬陽馬歲月久深松楠旅楹風雨侵蝕屬庀工而揆日敢移御以告安

寧宗皇帝殯宮文

伏以景彼崇丘恤其閔宇龍輶既遠虬柱斯傾屬鳩僦功敢告移御

昭慈聖獻皇后等奉安神御文

伏以柏宮恤淨厯歲月已深松楠延長為風雨所薄既竣徒役復妥靈旂

恭聖攢殿修整奏告文

伏以敢廟之嚴風雨所薄旅楹傾剝涓日繕修顧瞻慈
靈不敢不告

恭淑皇后修整攢宮殿文

伏以慈靈在天邃殿於穆其門有伉積歲不修涓日既
良鳩工是告

外制

與芮除武康軍節度使制